

卷  
施  
閣  
集

卷施閣詩卷第十一

陽湖洪亮吉著

五經聯騎集

辛亥壬子

雨窗讀何水部道生詩適有饋蟹者率賦一首卽題卷末

平明生輕寒秋雨閉門大窗風扇如鬼稍入竹數個起  
來天冥冥枯坐無一倣攬得一本詩中邊頁先破案頭  
光正黑捉就窗隙卧讀一首兩首大叫急起坐波濤欲  
掀屋日月忽顛簸無端蟠虹霓光怪生土苴排空一枝  
筆五岳透皆過凝然七字出重欲百馬馱又如五兵利  
當者無不挫讀時忽狂笑一屋悉驚邏一句復一滴恍

與檐漏和雖然萬言富無救一日餓忽然敲門來送蟹  
有鄰左是時雖正晝牆外黑若磨安排醋盈盞疊取薑  
桂剉呼童急斟酒好句我欲賀遺經嬾書寫卽此當清  
課時爲幼子讀詩一兩卷食蟹七八個快哉復快哉屋  
漏頂上墮

自蘆溝橋西入山至花梨坎道中作

山程七十里半道馬已死

時同行劉檢討湛齋馬忽斃

主人寄坐僕

告歸一馬乃載三人來前山蒼蒼月初出對面一山看  
落日微紅入水尙有光水底已復鋪新黃山風斜衝兩  
山口倦客欲眠山石走一峯櫺葉下趨人車上鈴鐸聲  
疑嗔客行無糧馬無草三兩人家閉門早却怪前頭紅

樹多橐駝不到山初好

自慧聚寺北行歷化陽朝陽觀音諸洞晚上極樂峯作  
峯形南北殊凹凸入地上天皆一日潛行五里不見天  
蠟炬光遠空浮烟芴苒森森綠疑夢蝙蝠手捫皆不動  
一風衝出微帶腥足底萬竅聲俱鳴好奇徑欲窮顛末  
行僮失聲炬將滅四人急轉我後來風黑恍有千人追  
是時屈指當交酉出洞見天天尙晝飲泉百盞神始清  
坐調鼻息方遠行樹巔斜行途轉窄鴉點撲人如雨黑  
東行一洞勢較低一洞復出清泉西斜陽沉沉嶺頭落  
客意極疲龕極樂下方已黑天頂青側帽恐碍當頭星  
自潭柘寺至龍潭久憩

一亭蓋清泉再轉泉已失山腹空若囊時時怪風出青  
松高穴蒼鼠肥紅葉遠雜烏雛飛四山茫茫樵跡稀山  
翠沁骨思添衣斜陽下嶺客上山山寺防虎門先關坡  
陀百轉行客餓林果却從頭上墮

宿慧聚寺山房

寺門望殿樓樓迥若天上一松蟠殿角高復出千丈山  
僧導客行不休石屋轉出青松頭客行開窗玩松頂下  
視僧房若居井秋衾鋪月夢不成一夜枕上皆松聲松  
耶雲耶不能省月裏千重百重影三更闌戶禮上真北  
斗正南來瞰人

日午抵潭柘寺至猗玗亭久坐

到門諸峯低青翠收一殿直上百級奇雲紅撲人面穿  
廊入厨院百匝水聲徧危亭圍衆綠當午無所見林杪  
開北風晴陽落如綫山牕當殿展涼燠亦時變朝饑誰  
可喻山果幸時薦吳筠雖說餅束皙仍賦麪卧枕明昌  
碑狂思永和譙亭有流觴曲水故云

慧聚寺夜起行馬鞍山麓

三更東峯明斜月逗林左連閭無人聲獨往意亦果北  
戶昨已扃山風自開鎖梢南通一徑細路出墻堦碧樹  
合作屏黃雲散成朶低同馴鹿步高與彌勒坐一寺十  
數廊閒行止餘我徘徊念儔侶水黑月已墮歸路愁徑  
昏山榴綻如火

山房與邵侍講晉涵話舊兼呈曹侍御錫齡劉檢討錫

五張運判道渥

憶昨從君遊青山謝公宅五更搖夢醒君苦行不得出門殘月尚在牆照見四野黃花黃傍花前行衣袂香綠鬢欲與花爭光看山百度花千度鏡裏朱顏已非故五嶽雖成汗漫遊一春每被風光誤洪崖仙人甯足誇君亦嬾種青門瓜雲山無意忽相合且拾山果烹谿茶對床七輩今誰似可惜三人已前死壬辰三月同遊青山七人今朱竹君先生張上舍方海黃二學士才名上舍詩還餘李嶠真才子尹仲則並下世

今日張顛有替人曹劉聯轡出風塵青松白石談遙夜

艷李天桃訂好春

時約明歲三月重遊

歸途遊石鏡山作

馬行半日坡皆陡，榦葉隨風出林走。  
桑乾河北飲馬時，却望樹色還參差。  
平沙茫茫埋馬膝，復有一山當路出。  
遠尋千級到寺巔，寺外城堞皆衝天。  
紅林蕭疎日光薄，破樓無鐘殿扉落。  
庭隅堆草濕一邊，夜半或有山魃眠。  
梧桐葉

梧桐葉秋來大如掌，蕭蕭西風催蕭蕭打門響。

何工部道生招飲卽席，羅山人聘曹指揮銳張運判道。  
渥合作一圖名秋堂雅集，因繫以詩。

一人畫山一人畫樹，旁有六七人嚶嚶屋中住。  
曹興宗昔時畫馬，今畫松羅江東畫人不工畫。  
鬼工張風子畫。



卽有風蕩葉恍起秋堂中兵曹詩百篇

法時

舍人酒一

斗劉湛

比部

談天

李石

我义手屋頭有樹樹杪山却怪

樹底門常關晚晴巷口車聲接一徑呼僮掃紅葉斜陽

入樹留一分道遠客欲趨城門

時帆居兩城

君不見山雛窺

客喜復嗔認是昨日遊山人

遊古寺

入門悄無人北風吹小住誰肯揖先生長身一松樹

朱孝女奉親圖

孝女婺源人誓志不嫁以養父母父亡事母幾二十

年及母沒孝女年已五十依兄弟以居繪父母象懸

室中朝夕事之如生其兄某爲作奉親圖索詩云爾

二十事父母三十依偏親四十作藐孤哀哀逮晨昏父  
亡事母母亦亡高齋却掃爲影堂影堂西偏兒所住生  
死不離親一步行年五十不下堂父母以外無尊章畫  
師敬復瞻顏色髮白未笄何可得椿兮萱兮合作圖旁  
有几榻兼詩書君不見孝可生孝可死由周秦逮今此  
伊誰作配光青史北宮之女嬰兒子

歲暮飲酒詩十篇

一屋無閒人勉復出門走一巷無閒人驅車出坊口東  
西街十里排戶款良友皆云出門久十至九不偶沿路  
爆竹聲兒童拍雙手車來仍復返斜日已交酉一世無  
閒人誰同飲盃酒

飲酒或不樂時時復嘯歌讀書有時疲披牋亦吟哦設  
榻書案旁所以消睡魔房廊亦周行時還撫庭柯大抵  
一日中良朋間經過飲酒時究少讀書時究多

自爲京朝官童僕色不展連晨朔風至寒色到雞犬吳  
奴昨告去朱戶別思欸今辰關右僕衣被亦將捲欲留  
心不忍各爲計安善十年依倚久一旦忽辭遠周親復  
交言食窘衣不暖笑讀東觀書何如北門管

學士不能飲而時負酒錢

法時軌喜招客

侍講久輟詩卿二獨

喜客贈篇孝廉耽宵吟

王楊甫

日出擁被眠廣文退食遲

汪劍潭

負券愁過年皆隔十里遙誰能比隄肩歡棕杳難

尋俗累苦復牽惟應孫比部

淵如

時闖笙歌筵

比鄰指揮署對戶車羸坊鄰雞第一聲馬嘶人亦忙否  
則公案側貫索聲琅琅羣動旣已繁吾行起徬徨門戶  
尙未開初日上北墻窺厨炊烟稀正苦瓶無糧吾師昔  
人言冬日則飲湯

歸鴉值歸鴉十十復五五酒人憶酒人相思倍云苦寥  
寥心一寸誰復可傾吐欲因西逝日寄此蜀江潯江水  
杳以深高原復相阻思君不能見夜起聽更鼓安得雙  
鯉來奇篇概今古

此首寄張同年船山

屋頭無星辰積晦已三夕凌晨先習霰騎馬懶入直生  
徒來饋歲野鷺間鮮鯽更有酒一樽聊云破岑寂雖慚  
通德里差比草元宅呼兒開美醞小酌經案側正好無

俗人門前雪盈尺

人皆處城西我獨居城東城西人不來賓坐時時空非  
徒息紛紜藉卧篇籍中日旰粥弟歸粥飯喜與同兒曹  
誦經餘得句輒復工爲善無近名我師陳仲弓干祿不  
欲多我法邴曼容興至卽舉杯消磨寺樓鐘

昨來京華居闕室作影堂晨昏覲吾親旬朔申辦香祿  
苦不逮親時時我心傷幸伴弱弟居諸甥亦隨行誨以  
勤讀書庶幾能顯揚歲晏風雪中懷人益傍徨一舅依  
郭門兩姊居江鄉何時能合并築室先壠旁

向生無他奇貧甚益偃蹇人言年歲竟屏當無一件開  
函展然笑一室尙仰偃泉明乞食詩吾行恐難免欣然

喻妻子且設歲除宴爲歡極今日先把百愁遣待過元  
日朝衣裘亦堪典

歲除以酒炙酹亡僕窺園并繫以詩

自余爲諸生汝卽侍左右皖江隨學使姑熟依太守兩  
年居白下一載住京口逮擢明經科相從浙東走窮冬  
遭大故九死返林薮汝也痛哭隨衣穿露跟肘經年聖  
廬內料理及糴浚一僕乘閒逃蓬門汝兼守余心感其  
義待汝乃不苟除喪來日下百事益紛糅春秋兩闋試  
十上九顛踣屈指十五年所值苦不偶親知久相弃汝  
乃誓不負落落十數州商蠹覓升黜遊梁才匝歲客陝  
時最久中誅金半百爲汝歸娶婦南下不半年長饑婦

先詬踉蹌復追及訴室有病母汝才工料事兼復習科  
蚪每寫百幅書人疑出余手余交徧區宇能一數某某  
孫黃暨崔趙識我交最厚不來同我憶來卽具尊酒各  
能諳食性默爲理菰韭武昌城郭外客歲歷申酉地也  
南北衝剗墟雜花柳平生汝頗謹苦被僚僕誘到此亦  
有由都緣婦奇醜妄心希外遇或可副箕帚放艇夜渡  
江時時逐鷄狗衙推頻乘隙間值墨尿毆有時方縱笑  
遭我出行陡厲色一禁之鞭笞願甘受扶病方就道風  
雪復連嘍余來幸通籍解汝顏色愀遣歸迎眷屬兼爲  
覓糧糗汝時雖已病聞語尙抖擻今年附舟至面色益  
昏黝殷勤覓醫藥病早醫乃後短至節氣長時時伏床

嘔屏除諸食品日僅啖菱藕沈疴由自取將死乃一割  
彌留三兩日作札呼汝舅瞠目不得言頭從枕邊叩卅  
年爲一世誰識汝不壽汝行雖厠僕汝義實兼友汝不  
善攝生吾行又誰咎急爲馳惡耗書至月已九汝母哭  
定癡汝父顏亦叟伶仃遺弱女學語未離穀一棺雖草  
草必爲枕卽首除夕酌一杯傷心汝知否

小除日寓齋卷施閣祭詩作

去年祭詩日同館挈仙史

謂張船山

今年祭詩時闔戶僅兒

子一兒讀詩業未醕一兒學選粗有文呼來筵上作陪  
祭不向屋外招詩人事功一歲慙何有詩一百篇文十  
首借之作達亦可憐敢向衆中誇不朽此筵設自我此



例舉自唐浪仙詩句鏤肝腎積歲預恐心神戕我詩直  
欲寫胸臆元氣未勵何由傷雖然一日間檢韵亦已忙  
灤河仙鹿北谷羊作脯聊潤詩人腸南鄰詬誶聲北巷  
市廛沸吾廬雖冷一事無尤喜門無索租吏一詩焚筵  
前一詩寄蜀中狂生避債作臺後預想掩戶浮千鐘我  
行亦返卷施谷欲仿長江作詩屋更邀諸老同祭詩短  
趙狂孫附癰陸

陸秀才繼輅年尚幼  
已工詩兒子友也

### 小除夕從家大人祭詩歌

飴孫

兒時放塾庭前過重慈提攜侍行坐桑陰屋側隨嬉  
遊手捧新詩當餘課十年負笈從師遊樓前學詠珊  
瑚鈎閒中分賦荷奇賞出語不肯同朋儔歸來朗誦

喜阿母慈顏一笑開  
眉愁歲除亦解束  
詩卷雅伴積軸堆  
床頭屋傍十畝富  
風景絕愛春晚兼  
新秋偶然好句覺  
自得僮僕往往咍  
呶艤舟亭畔蠡河  
地花落花開揔能  
記年華二十春二  
分入世文章敢遊  
戲春明北上隨慈  
親歲星在亥月在  
辰曾登鳧繹望泰  
岱更喜擊楫經渾  
淪看山看水不相  
識問名一一窮本  
根祝風咒雨一枝  
筆行客舟子驚奇  
珍燕中隨宦樂趨  
侍一卷兀兀隨晨  
昏過庭重誠爾小  
子學詩一語言重  
申閒堂月好命分  
賦擘牋搦管噓陽  
春一篇偶合長者  
笑一篇若拙長者  
嗔弟昆相賀復相  
戒冥索時復煩心  
神金臺芍藥閨河  
柳快飲百杯詩百  
首

夜闌掩戶時朗吟一屋兒童都上口卷施閣集排西  
東更列酒脯酬天工庭除恪侍作陪祭釭穗凝綠花  
冥濛太華培塿並時列光氣淩亂殊青紅瓣香縱不  
在前哲敢說家學能兼通他年倘得嫻一藝畧比過  
適隨坡公

花朝日獨遊二閘歸適馮編修集梧得田侍郎霽大通  
橋秋泛卷子索題因率書長句于後

花朝日展重陽圖百年風光今在無蓼紅荇碧色不減  
只有卷裏人俱徂河流北去都成岸驢背紅塵亦頻換  
誰從物外觀古今石堦亭亭峙天半惜哉秋好何如春  
津水乍綠無纖塵獨遊徑苦意蕭瑟坐恨不見當時人

百年似此清遊寡都策疲驢不騎馬沿堤正好迎面風  
攬得柳絲盈一把米船東來畫舸西百丈徃徃牽朱旗  
羣公觴詠致堪樂可念民力東南疲君不見東南十郡  
沿江澚陟險誰憐挽輸苦就中若以河沙量我亦江鄉  
一編戶田郎仁者固不同刻石告誡垂橋東即論文筆  
亦殊健赤幟已植騷壇中風光過眼誰能久感舊懷人  
一杯酒春禽送客如有情約我重來看新柳

葉舍人雯移居觀菜園上街東作圖索詩爲賦長句  
樓頭擘山作兩峯門外江漢流無窮先生開軒日正東  
繞宅萬樹桃花紅朝烹武昌魚暮飲江渚酒卅年撰述  
無不有博士一官堪白首無端欲將闔闔排愛看紅藥

翻當階江頭池館覓人住反使猿鳥情俱乖水程迢迢  
陸程少糧盡唯憑讀書飽津門橋南賃百驢囊金雖少  
書有餘竭來都門三易居菜圃開處真吾廬盤盤老屋  
橫街後分半貯書嫌不設鎖廳退直事亦忙目力苦短  
書聲長談心時接北街李編修松聯句尙有南頭王孝陽夫廉  
君不見買山何似還山住一樣門前幾株樹屋頭添得  
十丈塵失却雙川合流處

法學士式善屬題曹指揮銳張運判道渥所繪二卷子  
蓬壺有仙人早歲卽食祿所居尤禁近

丹闕森在目官清饒暇日當午駐車軸閉門詩作命萬  
事不貯腹我頃謂先生身外物皆足無須更誅茆天地

卽詩屋苦吟朝復夜雙舉日月燭惟愁鑿幽險或致鬼  
夜哭元氣不可滴期君返真璞詩名試屈指海內不五  
六餘如閱傳舍彼此可駐宿賞心雖偶寄過眼亦苦速  
茲龕庶哭兀表以出檐木名山原有待壇坫今已築我  
亦念故居卷施一隅谷

右詩龕圖

我家門前接早潮却行一里數十橋橋邊朱樓橋下艇  
千尺闌干漾清影扶橋楊柳高接天樓上著客疑飛仙  
偶然窗際落高詠却惹遊魚出波聽此橋此屋別幾年  
轉眼風月凋朱顏幸從塵外覓棲止百步尙有泉潏潏  
車聲馬聲何日歇每過橋名輒驚絕橋心何止無水流

反惹岸塵高尺一先生詩思本最超更喜畫裏逢溪橋  
桃花溪南楊柳梢著一斗室如鴉巢我因鄉夢頻生如  
君爲尋詩盍延伫徑攜秃筆及團蕉明日從君畫中住  
右溪橋詩思圖

寒食出遊詞

牆頭無雨聲牆下無草色杏花一枝空復情薄暝吹香  
作寒食春衣初試欲出門東風吹塵日已昏天橋南去  
路如掌楊柳缺處藏春墳春墳高高盡尺五貼徧紙錢  
知有王橋西燕子飛不停啄得幾家墳上土啄殘墳上  
土來作梁間塵堂前宴客開酒樽卽是掃墓歸來人世  
間行樂皆如此一邊生人一邊死消沉代謝那得知冷

眼却輸雙燕子東風吹塵日向西燕子亦逐遊蜂飛成  
團蝴蝶出門去屋角幾樹桃花低坡陀高低土無隙高  
種花枝下栽麥老翁徃歲食有餘麥穗旣黃桃實赤今  
年無雨桃少華麥隴三月飛黃沙關心歲事各惆悵令  
我與盡思還家歸來閉戶同誰語一枕輕寒夜如許忽  
驚飛夢到江南借得鶉鴝來喚雨

館僮折梨花一枝供膽瓶中率賦一絕

折枝聊復詡春華插向文窗影絳紗蝴蝶一雙來入定  
錯疑添得樹頭花

三月廿三夜丁香花下獨坐適法學士式善以庚戌辛  
亥兩年所作詩屬訂定因跋于後



卷之四  
十一  
丁香花底展君詩花穗千條月一絲句向卷中吟欲活  
月從窗裏墮多時商量握管題長句珍重臨風嗅亞枝  
明日欲邀花下醉更憑殘朶索新詞

三月晦前一日清曉獨遊法源寺看海棠花下值馮戶  
部敏昌因同過寺旁亡友黃二景仁舊寓室已傾圯  
不可入感賦一首

出門誰是看花路縱馬直前知不誤斜行七里破曙光  
馬不識途能嗅香平明一寺攔街出萬綠衝門馬驚逸  
客行下馬方拂塵花下已有先來人羨君何止尋花早  
花氣入簾餐欲飽十分花事惜已過砌下漸比枝頭多  
明朝更惜花無幾窗外怪風成陣起看花人老花莫悲

花下幾見常追隨不然花枝南頭兩間屋曾有詩蒐抱  
花宿眠時如鷗立如鶴看得開時復看落如今寂寞鎖  
幾春花屋祇當詩人墳門闌雨圯紙窗破時聆啞聲夜  
深墮君行歎息欲出門我更代花招客蒐君不見客蒐  
定在花深處怪底曙鴉啼不住

暇日校法學士式善張大令景運近詩率賦一篇代柬  
我詩時苦難法詩時苦易若欲詩筆工兩人先易地張  
君下筆有古人我詩下筆苦有我若論詩格超有人有  
我皆不可咄哉詩道匪易言何況雅頌至此已及三千  
年誰無好句播人口大抵來往起滅一一如雲烟天有  
日月星地有嶽與瀆筆端撼之不能動何以奴視荆朱

僕賁育若夫一身之內理更該心志各淩爍口眼各闔  
開不將我之心志口眼寄于古人四體百骸內始覺我  
與天地錯立成三才不能已于心乃復出諸口爲天地  
立言于我亦何有有所溢于目乃復矢厥音爲山水寫  
照而我何容心一言二言精不磨千語萬語甯嫌多鋪  
牋直可概八極濡墨真欲成江河然後張君詩法君詩  
牛腰巨卷擲我我欲頂禮同所師且令前萬古與後萬  
古得我數輩中立藉可相支持

晦日卷施閣餞春偶賦十首

紅杏枝前拜朔來丁香花底餞春回冷官一日無餘事  
祇向疎闌數舉杯

經旬常坐此花前  
花慢愁開日影煎  
怪底鬢絲都不潤  
江南拋却已三年

白雲間有護花心  
時墮高枝作曉陰  
雲起接天花委地  
欲憑誰與判升沉

細語擔鈴那得聞  
城東風物感羈魂  
春原一樣平如掌  
只少菜花黃到門

雨絲真欲比黃金  
尺五閑階草未侵  
九十日春晴過了  
却餘今日是春陰

春殘排日鎖飛沙  
自掩疎櫺護碧紗  
誰向燕南記風土  
屋頭青草窖中花

閒禽多半向城東  
花裏高樓面面通  
不看生紅看生綠

天壇十里柳絲風

送春歸處敞斜扉  
星露微茫裊衣休  
更梯牆看風色  
明朝不放紙鳶飛

悟徹繁華揔是空  
興來擲笛自西東  
尙餘幾尺斜陽影  
要與春花鬥晚紅

一種心情小婢猜  
四更猶自踏蒼苔  
燕疑殘月衝簾出  
那識幽人秉燭來

惜春詞

一風吹自東一雨來自西  
風催花作塵雨催花作泥  
作塵飛揚作泥定誰是  
春花舊心性桃枝欲窺廊柳枝欲窺樓  
窺廊見客行不休樓上柳眼看春愁  
入門復出門

不見碧天色離離滿徑堆綠陰明月欲從何地白心長  
夜短睡不甘曉夢亦復歸江南夢時看花醒時叫芍藥  
如盤向人笑

四月十三日張運判道渥招同王給諫友亮劉舍人錫  
五伊比部秉綬何水部道生胡文學翔雲陶上舍渙  
悅至海北寺街古藤書屋看花小集分韻得花字

一屋如舫門開斜半空吹香不見花入門老榦復橫路  
根古半入鄰人家抬頭花向竹梢颭一架正把天光遮  
綠雲濛濛雜紫霞花朵缺處蜂爲衙花光豈止潤眉宇  
坐久衣上濃香加主人華筵開咄嗟有畫可質無須賒  
巷南喧喧來酒車花片驚落隨飛鴉以花入酒沁齒牙

海濱石首津門蝦更喜蘆筍先抽芽年光慨如赴壑蛇

春止一日須豪奢

十五日立夏

握拳透爪拇陣譁上樹百徧

能搔爬酒盞嵌入枝了叔不爾恐有旁人掣十三清宵  
月正華笑視竹影生窗紗忽思逃席路復又一徑却好  
鳴官蛙到家冥冥吹曉笳袖底香氣留此此

自

御園田半道遊五塔寺寺中有古樹二株出檐幾數十

丈花開覆屋寺僧曰銀杏也爲賦一律

五塔寺邊雙樹奇馬行迂道欵禪扉高枝似向雲中出

落葉猶能天半飛清磬幾聲催夕照疎香十里點朝衣

鄰齋東去春如海

寺旁即極樂寺牡丹薔薇盛放

較爾濃陰覆院稀一

廿二日侵曉偕孫大至豐臺看芍藥

馬聲嘶過柳梢頭宛轉雲容清淺流十畝竟從人外闌  
萬花如向鏡中浮狂思海國春三月夢斷江城尺五樓  
小坐不妨遲日出滿汀濃綠撲簾鉤

國花堂看牡丹

新綠叢邊競吐芽柳陰先爲障飛沙縱教風雨無寒色  
占得樓臺是此花幾日酒中勞悵望有人簾底惜韶華  
如盤莫向閒時笑第一銷魂數謝家

崇效寺看海棠

入寺先教蜂蝶忙殿前一樹倚朝陽若逢蜀客應回首  
不作秋花恐斷腸夢雨心情初挹露冠春顏色肯施香



紅紅白白看千朶莫更臨風笑野棠

題阿少空彌達西尋河源卷子

鞭梢生層雲馬尾搖晴暉却行數里卽天上側帽忽礙  
星芒歸雲外一株樹我疑是落棠不然何以夸父擲杖  
來茲方石林何周遭復疑天盡處不然何以豎亥逡巡  
欲回步地高于天石壓雲北斗背上生峻岫幾回洗眼  
望來路祇覺黃氣一縷從東奔漢家西南羌元人鄂端  
尾去此不知凡有幾一條天路雖分明歷萬萬古無人  
經飲源三日馬亦靈五色石上飛而行天河轉近滄溟  
遠三面銀光截雲斷行經萬里無一人立久氣如春日  
煖乃知山經水注皆放哉眼底甫覓真源回道逢青鳥

亦不訝見慣捧日黃人來

閣中繪花翎黃馬掛

君不見相公奉

命安河流怒濤如雷喧七州此時那識鑿空使貌爾已

據天西頭一尋其源一疏委同日奏功

天子喜雲梯關北望板桐只隔地中三萬里

立秋前一日法庶子式善邀諸同人至積水潭滙通寺  
泛舟觀荷分韵得學字

入門一徑何磽确山鳥迎人如鼓樂繞垣三折到寺樓  
松櫟圍堂密如幄是時正值新晴後破曙園亭色班駁  
張顛窗裏先揮翰以指擘牋如可學卷頭祇寫波一層  
已覺清光動榱桷苦吟尙歎人聲雜逕上高枝與商榷  
何生入座先邀客後日出遊期可確時約逕南西門坡外金尚書園亭

陀高下石百堆坐啖水棧與瓜瓠新蓮去蒨桃芟核客  
未及餐遭鳥啄纍纍紅果堆綠陰不問鄰家棗先撲誰  
人升屋思逃酒墻角銀衫險遭捉樹頭啖果人不知風  
峭時時墮菱殼碧筒盃好長三尺荷露殊清酒偏濁東  
西捫陣何喧雜熱暑欲將衣袖濯趁閒拉客淩波去忽  
有小舟無木樵船頭三四船梢兩喜得吳儂體修掣豈  
惟快飲荷盤露盤底嫩紅時一搦離離百頃生晚涼此  
樂江南庶堪較坐中誰復詵詩健欲以持橈抵橫槩弄  
波東去香尤迥指爪時驚刺菱角潭平日落風正生手  
撼前汀鷺絲覺

法學士以康熙己未鴻博前輩徐嘉炎等崇效寺雪公

房探梅詩冊索題爲賦一律

棗花寺裏看花日我後諸君祇百年見說雪公疑古佛  
却驚梅榦亦飛仙馬蹄聲冷春三月鴻爪泥留尺五天  
莫哂阿儂題卷末後來應又作前賢

卷施閣詩卷第十二

陽湖洪亮吉著

黔中持節集

壬子

八月十四日闌中奉視學黔中之

命紀

恩八首

手披口誦日巡環清福誰言不等閒却愧

主恩原過厚校文纔了許看山

未妨旬日緩征程官閣西偏瑣院清

時居會經堂西

八百孤寒

倘回首使星猶傍玉階明

學荒甯好作人師心賞偏教下筆遲日向一堂橫處坐

沉思不異課經時

二十三人說聚星

三主試十八同考及丙橫排几案做收掌二人共二十三人

扉櫺諸公僻事勞相訪我尙應慙劉石經

一紙除書下九重凌晨傳徧棘闈中神仙亦有升沉感

閑向瑤階說杜沖

時分校十八人惟余及江西李編修傳熊奉觀學

恩命

箱擎甲乙卷縱橫宵漏沉沉入五更忽得一篇勤擊節

却逢紅燭語分明

俗言燭花語爲吉祥

七尺筠藍手乍拋

舉子入場例攜竹藍貯什物

竟攜文筆試同曹官

資深淺由君較

坐中有言科分深淺者是以及之

只我前年尙白袍

姓名題向榜頭遲短李才偏噪一時

填榜畢本房頗纔有知名之士

欲解顏先下淚孤兒十載已無師

予少孤從太安人授經今太安人下世已

十七  
年亥

九月十六日次子盼孫殤

一病經旬朔行蹤爲爾遲如何東喪日却值蓋棺時櫬

楚威初斂

子督課  
顯嚴

參苓命不支九原翻羨汝先得侍重

慈

兒爲太  
人所愛

臨發志感

萬里初持節經旬屢斷冤受

恩原色喜念母忽聲吞負米程非昔傳經席尙溫明明

昨宵夢親見倚閭門

蚤發良鄉小雨

村雞喔喔五更餘馬陟坡陀步轉徐昨日晚涼翻急雨

滿堤黃葉似遊魚

良鄉道中

我行雖值秋氣候已冬月尙喜天宇溫風霰猶未烈濛濛遠道開濕光楊柳綠盡初生黃歉鄉豈獨民無業樹底饑烏亦餐葉

早發涿州

寒夜雞失晨馬嘶聲愈警十籠銀燭輝遠遜殘月影由涇陽驛早發至望都縣小憩復抵清風店

早發涇陽驛兼程日未西力疲山縣馬聲短戍垣雞淀落雲千頃秋成菜百畦傳餐吾自愧車下有饑黎蓮花池募訪汪修撰如洋不值留柬一律



豈料塵千尺猶留水一方風沙來數驛烟雨忽橫塘漿  
仄開波暝星圓蓋樹涼主人何處在雙鶴入書堂

趙州雨花庵小憩壁間有雍正三年吳少宗伯襄題句  
和者甚衆亦用其韵作一首示菴僧滿坤

一菴當孔道終日鐸鈴譁但願土宜麥不須天雨花乍

醒完縣酒頻浣趙州茶知我南來客勞勞問九華

宗伯自題

九華山人故菴僧詢及之

邯鄲題呂祖祠

兩年前尙一書生持節今看萬里行自恐功名亦如夢  
漫逢人說是

皇程

自柏鄉至磁州道中雜詩

一日行兩驛所苦乏昏曉十日歷數州尤愁值僵殍眼  
中過百井生計殊草草閭邑雖尙盈歡顏抑何少日斜  
楊柳外一一閉門早驛亭依北郭路斷垣亦倒吏辭供  
億困愍此山縣小僮僕有人心宵餐不能飽

昨日馳縣東今日馳縣西屈指兩月中萬里積四蹄我  
願騎馬人惜此馬力疲渴引就水源行無使長饑此甯  
欲市恩體物或庶幾廐吏慘不仁鞭撻詎有期我詩寫  
驛亭墨淡字亦欹用以警牧民危言匪無稽

十里一驛樓三里一堡房塗皆列五軌楊柳疎成行持  
較江以南地力殊太荒行者色苦饑居者無餘糧岡原

何高低土脉鬱不揚洛水旣已微  
滏流庶湯湯欲著水利書俾引清  
濁漳越俎倘代謀何人宦茲方

北風連晨來節候已冬月荒荒野  
燒紅補此炊烟缺人家林木外氣  
象何凜冽饑來聊飲水乾糗苦時  
絕誠知年歲歉生理亦殊拙道逢  
馳背叟引與話清切辛苦無他言  
惟祈一冬雪

道中寄真定邱太守學劬

雨花庵內柏林中太守文章老更  
工得句便思勤寄與郵筒今變作  
詩筒

湯陰道中簡管同年世銘

時在河南撫署

強半詩從馬上成孤吟不覺過層  
城人因入洛三年別

天許看山萬里行尙喜石交難割席若論子舍各沾纓  
時君方居憂夷門東去繁臺路明日知君望遠情

衛輝行館憶已酉春計偕北上阻雨于此一日逆旅主人尙識之

臨街樓上雨縱橫三載重來感客情莫訝馬前雙節引道旁還識棄繻生

早發鄭州

此地通河洛車聲徹旦昏適逢秦歲首來過鄭時門百戰荒原在三椽遺愛存謂子產祠土垣青不斷一綫上朝曦

鄭州十八里舖

連閭擊柝破林昏候吏迎人過一村無數鵲聲原上起

日光濃塞戍樓門

自鄭州至新鄭道中作

鄭州及新鄭百里劣不足程其土色堅乃可礪剛鋸森  
森禿邱阜厥性不宜木行過郭店驛益覺欹地軸土門  
何陰森岡隴愈回複出如囊露穎入訝車脫輹是知名  
函陵曾不異函谷前行泥沒髀後矚塵眯目危橋經洧  
水我馬行始速十里陘山青原田亦輪綠

早發新鄭作

陘山月落尙有星紅燭亂注幽禽驚坡陀逼仄若行巷  
楊柳缺處天初明濛濛豈獨衣垂霧點滴初明馬頭露  
天寒十月已有梁無假縮足升車箱

將至潁水橋

高原日午露初收紅葉疎林尙帶秋岸勢欲南岡自北  
一條清潁向中流

十一日暮抵襄城行館作

龍陂山色參天半城內石坊高插漢昏時騎馬出南門  
烟水微茫欲無岸沿橋南北皆石堤鋪岸月色何高低  
排空忽奏軍門樂驚起大魚波面躍

抵南陽行館蔣表弟青曜自舞陽來訪因邀至前驛共  
宿談次出行卷索題爲拉雜書此并以志別

白雲谿之東書屋名團瓢君家屋東偏小巷走北條酣  
嬉少年遊厥性誰最豪我齒加長三賭跳欲競高阿母

愛汝深縱汝塾屢逃壓袖十數錢日市倪婆糕上樹或  
偶閒牆東紙鳶飄阿定與阿馨屈指無汝刁光景若目  
前歲月忽已遙自余爲孤兒怕與親串遭往事一縱思  
痛極祇欲號十年三值君京洛及漢皋情話苦太長日  
短繼以宵今作萬里別離裏益蕭騷爲汝設一筵環之  
以兒曹汝姊亦不眠頻將燭花挑袖中出短圖灑落白  
紵袍頽松兩三株日午響怒濤不飲顏亦紅陰聲激林  
梢鬢豈類禿鶯須亦磔蝟毛欲我作一詩爲汝畧解嘲  
前贅汴水頭樂土願久僑我意乃不然欲汝返舊巢庶  
幾三徑中剪此蓬茅蒿他時我歸田與汝頻招邀投老  
暇日多歡悰續垂髫支木斗拱間勻顙補堂坳盆池盆

栽荷更植千葉桃因君夢還鄉小立紅闌橋我醒君已  
行雙淚頻頻拋

王大令復以雪苑消寒集屬題因憶甲辰乙巳間與大  
令同客西安畢尙書師幕府亦有此集預其會者吳  
舍人泰來嚴侍讀長明賈上舍元模莊通判忻錢州  
倅站朱秀才燠徐布衣堅蔣縣丞齊耀王文學開沃  
孫比部星衍凡十人今甫八年存沒相間不勝褻舊  
之情爰作一篇跋大令集後并寄尙書師武昌

憶昨三冬飲誰如十客閒嚴吳歸地下王賈散人間別  
有神仙侶偏淪簿尉班

謂錢蔣

朱雲稱久疾孫楚亦長鰥

避債媧山側

謂莊

逃禪胥水灣

謂餘

襟期總霄漢遊戲偶塵



寰醉每忘階級狂甯避謗訕別來經歲月遙隔萬雲山

吾子官初達高齋客乍還一編沿故事百首許重刪驚

坐名原振

陳明經夢詩最多

登樓賦早嫺勝遊何灑落逸興與

躋攀水碧園衣帶峯青門髻鬟嘔心憐句好握手恨緣

慳我愧持雙節行將化百蠻凌門欣慰尺

謂尚書師在武昌

沔

水歎回環屬有同堂誼

時方子雲孫香泉皆同在幕府

都愁會面艱感

恩情抑抑懷舊淚潛潛爾日風多厲相思月乍彎持牋

不能寐已恐鬢添斑

夜至林水驛

薄醉馳三驛迷途轉數岡岸藏茅屋小村入密林長水

鳥依沙白天星映月黃依微有漁火此景是江鄉

夜抵呂堰驛因憶戊申八月與方五正澍赴武昌阻雨  
于此却寄一首時方尙在武昌節署

歷歷經遊所明明笑語溫半廊斜礙砌雙榻小依門隸  
覺饑年瘦燈憐雨夜昏思君幾回喚恐有舊時魂

樊城

樊城三萬戶笑語徹晴江帶得斜陽影都開臨水窗  
賽神沿楚俗吹笛雜吳腔正好衝風渡漁人盪漿雙

涉漢欲至峴首輿丁誤輿入九宮山時日已將暝因小  
憇而返

山光欲雨江欲晴雲黑復白波微明此時擊楫涉江去  
薄暝始向前山行林梢一抹斜陽色高下山礐一千尺

雲中道士來遠迎語不分明指碑石纍纍林果紅一山  
傾耳祇覺禽聲蠻道旁礫石削如鐵山溜滴瀝苔花斑  
沿岡久立怯北風送客出戶聞敲鐘昏江棱棱水聲起  
却喜一星明舵尾

羊杜祠

拍手兒童送遠行荒祠重到轉欹傾金環倘識生前事  
石碣誰爭死後名偶爾折肱成素志居然垂甕戮遺氓  
何如祇學山公飲日日高陽未解醒

宜城

一路沿江轉隨帆到郭門燈明小河集縣古大堤村欲  
飲宜城酒偏貽京口尊

是夕署縣事楊君餞京口百花酒

壁間詩句在

三復憶狂孫

行館壁上黏余及淵如聯句詩

將至荊州先柬太守崔丈龍見

昔年判鄔鎮昨來佐臨安我皆騎驢來訪舊河之干痛

飲曾幾時丈人復原官

君前守順慶緣事左遷近始復原官

郎君昨來稱

使星次者近復成明經劉綱夫婦鬢猶綠往往聯句開

中庭棗前五輩吾皆識阿四形疲阿三瘠因君我復念

存亡痛哭東山謝安石

君爲尚書錢文敏公壻是以云

我今行役敢厭

遙昔者司寇馳星輶相傳一日行五驛髀肉總向忙中

消棱棱執法原無礙過峻差貽後時悔王令先悲少子

亡鄭公幸有孤孫在此州地大甲楚中城險況值江流

衝五年民氣未全復所願吏好年常豐尙書用法公施

惠法立民方識慈愛但使遺黎說有瘳何妨大府稱無  
害武昌欲往道苦迂我視荆郢兼程趨心知尺一定相  
逐果有驛使來通衢談深夜久殊難別駐馬御褰謀久  
歇酒酣試問座上人量好何如浙西日我持使節難久  
停明日送我西南程匆匆更作道旁語殘月欲向衣邊  
明武陵南去桃源路回望荆門在何處一山歷盡復一  
山不到青天恐難住

自麗陽至石橋驛道中作

移居欲避千章木山鳥山人齊出谷高低一月共苦辛  
高處結巢低蓋屋客行望谷如可遊前欲涉水愁無舟  
茅齋了了見烟火笑語自共谿聲流背岡北去行難速

老方園詩集卷十二  
六  
嬾向溪東石橋宿三更入門甫卸裘頻起開戶看山光  
寺鐘初鳴鵲聲起月墮長林三十里

早抵荊門州憩象山書院

殘月已墮風淒清水綠自向城頭明冥濛山徑開一綫  
簾栗吹處幽禽驚吟堂豈獨山堆案堂下水聲還拍岸  
芙渠雖枯菱葉黃枝榦尚帶前時香周堂綠竹復千箇  
惹我百徧踰回廊堂虛無人水聲急鶴到空亭與長揖  
出門數步馬忽驚却訝樹頭山欲立

本欲詣武昌以驛道迂回不果行次建陽驛三鼓得尙  
書師急遞以適欲至襄陽閱兵爲先期行二日約相  
會于鍾祥塗次時亮吉已越行二百餘里勢不能回

車再圖握手夜起不寐輒成長句一篇却寄

從公十年遊八年居幕府離公祇兩載月僅二十五餘

已酉春從武昌計偕北上至壬子三月尚書入覲都門復得握手統計別時僅二十五月耳 去年公

入覲復得旬日從自喜師弟緣時可意外逢慈恩縱愧

傳衣鉢幸出公門早持節盤盤百驛敢厭遙更喜路從

荆沔出才過新野縣已得鄂渚牋橐鞬一何雄控馬拜

道邊襄陽日訪閑僧寺兩日待公書不至酒酣上馬嬾

出城縱有峴首愁重經大堤南去方逾夕夜宿荆門建

陽驛三更門外遞急郵失喜讀罷翻成愁偏憐此度緣

難巧急遞書遲我行早自悔王尊叱馭忙欲從墨子回

車好細思會合亦有期公待人相光綸扉同門數子各

清要

謂邵二雲孫淵如

我亦官滿歸京師城南奕奕鳴珂里早

侍趨朝暮歸叩三館讐書我定隨百篇脫稿公應喜此時憶公因不眠起視落月行檐前曹騰却夢旌麾過只隔武陵山一座

抵荊州

早行荆南展然喜碎甃砌塗三十里渡舟復有雨下蓬恍若置我秦淮中濛濛水綠低飛鳥近郭更聞人語好差憐屋瓦碎不完昨者江浪衝城垣危樓傾欹石坊倒城北至今人戶少爾來差喜皆有年移戶漸入居城邊長衢似砥房廊寡願飭官窰急燒瓦此州歷歷鎮重兵戶號十萬田疇盈災傷元氣亦易復吏不擾民民已足



宰官逐我勸駐驂導訪息壤來城南荆臺遺跡渺何處  
但見蒼茫接江樹西琛南貝夾道陳簫鼓一城稱賽神  
君不見新城巖巖堤屹屹我仰

廟謨同禹烈

城工及堤皆奉勅建

至公安寄崔三景侃

十年五度手頻分猶喜常時人夢勤行到驛亭殘月出  
一叢修竹卧思君

澧州城外渡溁澧諸水作

澧水綠如玉水清魚露目沿波惹得鷺絲忙高下日光  
飛不足紅霞欲渡波攔住一綫分明接天處溁波入澧  
澧入沅欲向何處尋江湍殊方晚稻收偏早黃葉自零

花自好行人十里香筍蹊踏得沔陽岸頭草

宿澧州行館夜雨因柬州守方維祺

昨來行館宿蕉栢雨縱橫更漏分明處思君吏術精一  
麾今出守三拜昔知名他日沔陽浦彌添望遠精

至清化驛

澧州六十里行抵清化驛其中涉三水淺者亦沒膝前  
旌及行李半晌渡方畢盤盤升頽岡轉轉歷黝穴肩輿  
忽高視天上炊烟出回頭戒僕御至彼謀久歇初日出  
縱高杉林帶殘月晴光時破碎宿雨明復滅岡南勢稍  
坦我馬行已疾手劈樹上橙聊先慰饑渴

大龍驛道中

五塘汎南塗百折二十四岡斜刺日大岡如龍小如虎  
復有如雷水聲阻肩輿力盡跨馬行屈指籠燭當相迎  
溪風蕭蕭生馬尾一綫日光馳卅里

桃源行

沅江水碧疑無岸一路布帆飛入縣藍輿偶憶義熙年  
三復陶公一篇傳我知栗里宅卽是桃花源武陵路遠  
不須涉咫尺好上潯陽船陶然酒後詩成偶可識漁人  
亦烏有試問千株洞口桃何如一帶門前柳北窗日共  
羲皇遊眼底尙恐無殷周何言秦漢與魏晉卑論不欲  
驚時流華胥以上風尤厚事隔千年已非舊雲中雞犬  
倘有知肯出淮南八公後但書甲子仍作詩此意亦有

誰人知永初開國是何世不若洞裏忘年時沉沉遠岸  
楓林出恍若溪桃欲成實波流千折樹百盤再轉或恐  
逢真源

夜抵桃源宿江上行館

澧水旣已綠沅江流益清三更鑑江波波影逾空明昨  
宵雨足山流黛添得江波幾層翠帆空若行明鏡中鏡  
裏對舞山禽紅涉江何處江波狹欲向回塘問鷓鴣鷓  
鴣忽迎殘月飛扇得水波流向西溪深綠暗途尤阻纔  
見郵亭一燈吐三層閣上客少休閣底自任江聲流虛  
窗閃白疑人面却是布帆來一片

桃源行館夜起

明知宵漏竟開牖光尙黑萬木裏一亭森森日難赤瞻  
西殘月影微露遠山碧高低飄濕翠不放白雲白江溜  
昨有聲回汀沒三尺

涉蘇溪

蘇溪何彎環中有百家屋出門臨水坐炊飯白如玉樹  
頭山果殊酸甜祇向縣中求食鹽涉溪前行馬礙脚水  
鴨多于枝上鵲

過長板塘進山口作

甫過長水塘山色當晝昏林木旣回翳湍聲急東奔樹  
杪出數家竟闌東出門非徒便趨麓藉可瞻朝嗽欲習  
筋力勤絕壁居子孫昨構木百章營巢畜雞豚空處立

一橋下倚松柏根我渴趨此林索水貯瓦盆箕踞進一瓢詎識官長尊戒吏勿使呵喜彼風俗淳

武陵行館飯畢戲作

飲溪何其涼佐以稜稜薑

自常德以上水性過寒每食必啖薑少許

煮魚何

過美芼此青青菜溪田晚稻亦有香山果嫩綠橙生黃  
蠶腸似荷山神憫爲我一林生瘦筍

新店驛夜起

四更林梢明月出光甚暫山禽影落波反使遊魚啖欲  
攜雙艇子遠至谿南泛離岸山雨來衝波閃燈暗

出新店驛雨暫止留東李學使傳熊

積晦殊難霽山靈倘待君料量三日雨留得一溪雲高

閣燈初燼東峯曙欲分猶餘竹間露衣上灑紛紛

入沅陵縣界雨中遠望壺頭諸山

沿溪雨猶零上嶺天始曙帶得桃源雲來穿沅陵樹濛濛竹木覆一山不見馬公穿岸處男兒出身須立名足底萬里遊行輕雖然垂老亦宜審當日何意輕南征君不見二十八將登雲臺馬革獨裹公尸回論功我意亦未允不特蕙苴遭嫌疑蕭蕭谷口松杉直怒幹都抽一千尺精靈倘化蜀山蛇夜夜山頭望京國

相傳穿岸處有一巨蟒即

公精靈所化也

發界亭驛

昨宿新店驛今居界亭谷試看黔中山久已離地軸藍

輿不至天恐未得歸宿雲中數騎出北斗貼馬足我驚  
一回顧詫是我後來僕濛濛露迷眼背上北風肅高處難  
久停身心願時束

廿八日五鼓師子塘西見殘月

如塵似霧影溪流惹得行人馬上愁却比初三更消瘦  
曉星一箇占當頭

過揚武堡升嶺

我方下嶺謀少休前騎又復穿雲頭藍輿待得上岡脊  
一谷白雲無馬跡高高下下半日中百徧起伏隨雲峯  
有時望嶺行欲及石復離雲自孤立半空山果紅欲然  
連臂恨不如羣猿到來始信高居好從此擡頭已無鳥



將至辰州先柬陳太守廷慶

到州已歷百重山消息應知太守閒  
釀酒乍迎千里客作歌欲化五谿蠻  
日邊書至顏先啓天上詩成手自刪  
爲問玉堂前度宿可曾飛夢入壺關

界亭驛南以山險肩輿增繹夫八名

卅日歷萬山所幸軀未損今晨出門望失喜忽一哂輿  
丁增八箇繫繹筍輿本爲言塗崎嶇藉此力勉屈不然  
升陡壁或復致狂窘我感郵卒意百計致安穩回思立  
身處曾未藉牽引茲雖憑衆力失足亦能殞途同蟻旋  
磨客類牛負紉高低旣相倚曲折若施準天路卽可通  
吾心尙當忖

白露塘道中

沅陵三百里秀止萃林木居人讀書少見客輒瞠目雖  
云枕山佳愛結水邊屋十月溪無梁行歌赤雙足山深  
寒不至荷榦尚芬馥商畧出市鹽門前菜畦綠

山行

日光沉入淵水光浮上嶺水日空明中禽魚趣何永無  
窮物外意所苦人不省魚將蘋作屋鳥以谷爲井飛行  
甯復越各若守疆境我讀莊周書閒觀倘心領

廿八夜飲陳太守廷慶署醉甚四鼓起行四十里至馬  
溪河乃稍醒

森森萬竹竿日出溪上綠涉此徑寸波溪魚圍馬足溪

流三折忽暫停石上戴土營危亭茅菴一僧閒誦經烹  
茶餉客酒始醒指途南行入峯缺壁陡仍煩數人曳沿  
山松竹忽無聲一嶺蘆花白如雪

將至辰州道中望大小西諸山作

施黔江上望山路劣纔通天壓松杉綠雲連橘柚紅緩

行長水驛時見伏波宮

入沅陵界居人祀伏波甚虔

我亦無他願書

藏大酉中

初一日未曙渡辰溪

一州及四縣皆以水得名凌晨渡辰溪天黑尙未明卧  
聽柔櫓聲知較沅水平上流一燈飄爭渡喧有聲輕帆  
觸烟來誤句溪左行船丁正徘徊穿出林鳩鳴

從山塘驛行十里至龍門塘一陡坡作

削峯峩峩天半立白馬白雲爭路入有時雲向馬首飄  
馬足亦與雲爭高坡陀直下蹄難駐雲始離山欲升樹  
乃知馬亦戀白雲行過西坡復回頭

渡周溪入山

沿山三日西南行山果愈美溪魚腥出門忘挈種樹經  
靈橘百樹疑冬青水花茫茫亦登陸一頃寒蘆雜修竹  
山危不平心轉平馬上睡起知身輕

十一月朔日發懷化驛輿丁甚速行三十里至板橋塘  
天始曙

四更排馬陟山岡候火齊明竹樹光欲向藍輿續殘夢

鑼聲驚過第三塘

每至一塘鑼兵  
擊鉦相迎

雙溪水繞一山流  
溪上冥濛薄霧收  
睡起不知雲弄采  
錯疑天半有朱樓

### 大山頂

山頂樹樹杪人樹底歷歷吹輕塵  
回頭人復出樹底樹上棱棱一山起  
危塗似却反得前要在絕地方通天  
拋書莫笑無心得幾日山行增學識

### 板橋塘北入山

五色溪光炫眼新  
到來不信是蕭辰  
穿林石墮偏驚鳥  
出嶺雲奇欲趁人  
小夢乍迷千樹橘  
長吟想見萬山春  
行經谷口須重問  
恐有當時鄭子真

已刻抵羅舊驛

我來羅舊驛日已及午候陰晴勢未分赤白雲相鬥須  
與赤雲升日影乃微溜白雲復歸谷空作一川皺山雲  
本無心人意有左右白鳥亦喜晴勞勞向川咒  
抵羅舊汎卽沿無水行

今來見無溪不復憶沅澧同此石磷磷無流清到底沿  
溪山百折勢斷復中起似欲勒波住不放出山裏魚遊  
戀潭曲鳥亦鑑波喜最羨臨水居峯峯石如洗房廊藏  
暗谷石罅墮蕉尾天半露一窗知聞馬嘶起

山行至一谷

好奇往往入雲厠此谷樵人或未經行到上頭心轉怯

四山綠欲破天青

至巴洲汎無水中生一洲長幾一里無水至此分流復合

無谿忽分流水色仍可辨洲窮溪復合波影益葱蒨沿溪盤細徑直下欲如綫馬走北谷中恍若帆一片紆回出林杪馬上露人面同行成久別忽復得相見稍休厓石上一一喚名徧愛水故緩行吾真欲成殿

自芷江縣曉行

沅州出西門頗苦歷永巷

出城卽板橋長逾一里上坊皆覆屋馬行幾不能舉首坊

屢無隙地覆屋不獲仰俯行一里始出坊欲曙未曙星猶光溪深谷陡杳難辨撲面祇覺林蒼蒼前旌半日途

疑失數騎驚看隔山出人行貼樹馬逼厓上下朱纓紅  
奪橘看山一路不覺疲吐納雲氣忘朝饑峯奇正惹人  
回顧急溜偏從馬頭注

下山至大栗塘

興亡愁上山我意怯下嶺步放不得停顛危出俄頃白  
雲英英鋪嶺平誰識左右山崎嶇行人欲前飛鳥停勸  
客暫憩山前亭一坡棱棱注千尺直下途危況深黑始  
知身世總若浮瞥若鴻毛輕一擲

上回龍關

夕宿無谿西朝發明山東藍輿天半忽一折坐處正落  
空潭中心驚不敢復俯視尙喜缺處交長松回頭顧僕



復不至人說尙隔雲重重行經平地願少憩飽聽萬壑  
衝松風

山行

探奇因失路觸處總高墳渡水雲成陣爭山獸作羣轉  
愁人跡少渺與世塗分一晌支頤坐沉沉靜見聞

便水驛行館見水仙一盆榦長三尺香亦較江鄉者馥  
郁爲賦一絕

傍山臨水幾人家下馬匆匆感歲華牽得客懷無別事  
芷江驛裏一枝花

騎馬行

我昔居里門騎馬如騎龍屏息不敢言急復掣馬駿十

年作客奔馳急與馬誰知日相習風陵渡北中條西百

里風馳入安邑

謂赴黃仲則之零一日馳二百餘里

卽今騎馬如騎年馬

亦步步隨低昂愛之不忍復鞭策一日常教餘馬力朱  
纓纍纍玉鞭把我馬力常先衆馬舉鞭問僕笑不休何  
似吳下蜻蜓舟

渡無溪

土人名大河

溪亭皆有屋分半水禽巢昨夜前灘漲遊魚上樹梢  
無溪道中

我行十日歷五谿馬蹄不南卽向西

凡渡澧沅施辰無五水

山深

愈轉塗愈出令我日日看山疲臨溪飯罷行尤急轉眼  
斜陽欲追及亦知此地近西垂好擇一山看日入

將至波州汎行入一山轉轉不得出林木甚美爲小憩  
少頃乃別

沿溪北折山如夢濃綠堆林欲無縫忽然樹杪一綫開  
穴底倒射天光來一村松竹復疑繪鷄犬亦雜居樓臺  
林陰染黛山成幄我酌水泉疑漱玉君不見炊光上與  
雲頭平烟次亦徹仙人肩他時縱復得霞舉誓與此山  
通性靈僕夫催行三十里我坐松陰不能起卜鄰結宅  
亦虛言但假十日山中眠

波州汎南上山

東峯視西峯已與碧天界南峯更孤迥意乃出天外峯  
頭一峯雲不收似向天外仍回頭前山行完後山阻我

識天公用心苦六曲屏風界黔楚

將至大魚塘山行

水聲湍急處山亦讓溪流只此萬峯隙何來一葉丹石  
潭魚瑣碎竹徑鳥鉤輒正覺孤吟好黃梅發嶺頭  
過風木塘有感

及此塘西路連岡百折餘徑荒飛野馬名古泣皋魚人  
說官資好吾傷祿養虛望原徒步過不忍坐藍輿

曉發玉屏劉教諭嗣武陳訓導秀升率諸生相送輿中

口占六首示之

一例青衫馬首迎羅施山半見諸生眼前指點爲文法  
似此峯巒始不平

童年敢說有師承一事如今記尙能堂北雪深三尺路

不曾辜負讀書燈

予少孤蒙太安人授經

潛修莫恨閉門遲倍惜分陰是此時却喜十州民氣愿

殿頭早荷

聖人知

名見日蒙士習渚樸須勤爲教導

諭以黔省

閣帖堂碑奈俗何烏焉三寫已成訛子雲門下生徒盛

誰比侯芭識字多

一字離音總不成黔音差較楚音清諸生莫慣稱天籟

好屈周顒學四聲

我無奇術報

殊恩欲闢當時通德門他日講堂勤問業六經誰似鄭

公孫

發玉屏縣

玉屏及清溪五十里不足其中山雜沓頗覺寡平陸寥  
寥依斤堠時有幾家屋西南綠吞山雲歛日光縮猶欣  
枝上竦土性無曲木山凹諸土著居各面林麓邊徼歲  
屢登稍聞事儲蓄深林鵲聲喜時得啄餘粟前及羊坪  
塘村烟已成簇

山行

出山泉百折殊有戀山心澗水復時落重源何處尋紫  
藤垂岸陡白鳥渡波陰卧聽灘聲急勞勞自古今  
將至漫溪塘

漫溪途猶危絕巘立斥堠心疑不能到再轉谷已湊迤  
坡何洶洶雲出與石鬥不知雲起落但覺一山皺前行  
塗轉晦時見涉波獸濃綠復萬重密林無正晝  
將至清溪縣上嶺

障坡千萬樹不覺有山城忽訝鳥巢外時飄人語聲撥  
雲看塔峻映柳識橋橫及渡清溪水方知水色清

清溪行館見梅一株花甚爛漫喜而有作

風利如刀雨若梳一林花密竹蕭疎牆頭更有山無數  
疑是江南二月初

何曾驛使解封題空向長安醉似泥三載別來惟兩面

白雲溪外卽青溪

鄰門不產梅惟庚戌春初對嶺北杜  
齊耀我于舍南竹樹老樹

適放數花然不  
及此十分之一

夜移瓶梅入紙帳作伴曉起香愈酷烈復賦一首

自來荆郢南路愛曉行馬蹄慣踏紅燭影送盡殘月  
聞鐘清偏憐昨夕山窗裏竄滯疎香不能起風疎雨薄  
送出城猶執一花籠袖底

發清溪縣至梅溪塘二十里沿無水行山徑逼仄幾不  
能上

盤山道險幾不通大石礙路如癡龍灘聲愈急嶺愈峻  
嶺似不放溪流東一卒引馬十卒引輿頗念衝途人不  
得常安居兒童生小登山易履險真如履平地百錢縛  
肘飭繫腰口吸山泉詫甘味梅溪才過復小溪十里肩



上藍輿飛書簽倒落茶具剖只有梅枝猶在手山行望  
舟始覺平舵樓客眠尙未醒君不見行經平地僕夫喜  
一葉舟驚笑波起

渡水至焦溪行館山水環抱林木尤邃覺巖灘刻中無  
此奇勝也

山百折溪百回到來山水欲俱斷一葉忽破青冥來南  
津樓北津樓津樹對出雲分流嵐光密處山花好十月  
猶青堤上草沿溪一帶飛綠烟偏向人家鏡中裊人來  
岸南立少時岸北征馬聞驚嘶行人衝寒馬流汗馬影  
度波魚忽竄

盤石塘

縣中行兩日山險止梗道東西無起訖所苦窶阨要行  
經盤石汎石脉始森峭奇峯破天出頽石突若潮排空  
立一徑萬古不得到中疑穴靈怪縷縷雲出窾飛瀑復  
百重誰能抉真奧生平好奇性失喜忽一笑尋路欲出  
山鷓鴣恍前導

侵曉入太和洞

轉覺岡巒峻難容地脉回客方升閣望山欲渡溪來市  
郭燈初暗帆檣霧未開半時心境澈孤坐此層臺

上油榨關

一石橫絕天一石橫塞地盤空兩巨石缺處復鋒利雖  
云置營汎劣僅入隻騎前經絕壁下轉覺人馬細東南

初破曙一縷入雲氣大息撫鳥巢吾形願同寄

下關逢驛使却寄張同年問陶

時張方由蜀入都

君來蜀道如天上我渡黔關入地中今夜相思倘回首  
各從北斗辨西東

相見坡

小相見坡折不休三起三落時句留藍輿正對我來路  
迎面不復勞回頭盤盤路向雲中辨七里來尋大相見  
石古途危細如綫馬頭亂撥雲濛濛馬上人面猶雲中  
東西對立峯何陡天半驚看一招手馬頭已西人面東  
隱約尙見坡竿紅飛泉攔路復衝出人面始同坡面隔  
下坡十里行轉遲縱不相見還相思還相思不相見我

願天下人皆如此坡面東西縱復隔浮雲一日之中時  
隱見或云會面數則離此則仍復分東西雙坡近又判  
兩縣屬大相見坡施秉亦若古者好友百里愁分攜乃知在遠  
仍如邇我念神交倘如此劉家塘畔作一詩火急封貽  
二三子

偏橋

重鎮當年建節旄石闌千步尙迢迢江南到此川程絕  
想亦應名萬里橋

天梯關

在施秉縣城內

樓閣排空雉堞齊霓旌高閃夕陽低萬山過盡疑天上  
不信前頭尙有梯

二鼓至飛雲巖秉炬上巖畧周覽卽回至養雲閣宿平  
明獨行上巖并至聖果亭雲根泉等八憩

藍輿小睡已二更半里外響飛泉聲入門一徑生虛白  
是石是雲同一色前行百級卽少休秉炬却憩巖西頭  
征衣暫付山童澣先煮山泉與山欸自來京國夢始寒  
枕上一夜鳴飛湍平明待得雲全出始向山根搜石窟  
乃知雲亦無石奇石轉覺瘦雲嫌肥纍纍却似枝垂果  
一朵峯尤奇一朵飛騰只在人眼前不遽拔地思升天  
遵巔欲及仍難及石却戴松空處立玲瓏百竅生百松  
飛起松亦當排空松身夭矯本若龍會見汝植天月中  
須臾日晦光開闔雲復飛來與山合出門雲動不待行

雲脚送我來黃平

巖側古梅一株花正放

碧澗層層暗綠苔石闌干畔久徘徊不知樹向巖中出  
祇覺香從頭上來新月正宜當檻坐高枝疑欲待人開

寺僧云今日  
花始盛放

泉聲石色都成戀便繞花光亦百回

黃平州西見日出

黔中行兩日天短日苦陰玉屏及清溪尤若日暮行黃  
平州北逢初七甫見平衢流赤日車前歡喜到八騶馬  
上曝背寒威收宜娘山外風尤峭一半花苗出趨廟紅  
綾肩上羊一腔七尺花幡引神輦相違百里風土殊山  
前老苗亦讀書怪來門帖宜春字明日欣逢日長至

至日發重安江行館憶京師早朝諸君子

過盡州西劣崩峯重安江水綠溶溶獨從萬里橋邊宿

却憶千官闕下逢 三殿左趨燈影密

石經國史諸館皆在殿左

五雲高捧日華重幾年此夕朝

天慣猶向山齋數曉鐘

渡重安江上嶺作

三里與江背泠泠響尙聞前經百重樹始隔一川雲天

向松梢暝途從石罅分寄書情較切空有雁成羣

入大風洞半里阻水不得進

途行抵清平山不秀而樸盤盤十里外石脉已潛伏巉

巖當面出劣欲轉地軸停輿入欹徑風氣早森肅泉流

四飛注細石時礙足絕險劈一門途寬不紆曲東南諸  
洞穴所苦地維促茲遊庶森爽敞及萬間屋恍若古達  
人推心貯人腹渾淪含衆有不太別清濁巖奇列千竅  
尙未及雕劖乘虛一燈入百怪露人目風輪覺森森大  
氣自回復褰裳行欲進捫黑若相觸陰房長入夜日月  
光不燭狂思傾海水一洗龍霧毒東西靈境闕真見列  
松竹

方志云洞深可廿里許昔有高一廬者秉燭坐一  
炬深入忽見天光豁然洞外松竹森列

縱思莓苔照人綠

晚晴自白泥塘至楊老驛山行

才收薄霧卽新晴似畫溪山馬首迎添得白雲成睥睨  
連岡真似古長城



白泥塘北石零星下坂難教足暫停幽絕山村幾家屋  
晚霞黃處炊烟青

宿楊老驛

兩山中間夾一驛驛路如繩盡高出山凹忽現數百家  
瓦屋鱗鱗若居穴下山欲向橋南住水碧堤青渺無路  
更殘繞砌空百回新月不過山岡來

度響琴峽

排空石筍立一山人向筍上行轡環藍輿舍此卽無路  
危在皆從筍尖步行人至此亦掉心空有細響同鳴琴  
琴聲愈急步愈促一跌幾將陷山腹我行萬山無此奇  
過此一折山仍夷君不見危塗莫謂無人到此是康莊

通六詔

黃花坪道中

黔中雖易雨一雨亦易晴濕翠甫欲收早喜霞光明山  
花亦時開助以百草馨最好山徑奇一轉一曲屏才過  
清水塘已抵黃花坪回頭望諸山復覺雲冥冥

冷溪塘

四山盡高出中陷若一井居人欲入縣數里方及嶺松  
櫟若井闌沈沈閉升景塘兵瞻導騎半日已引領樹杪  
百尺樓樓前柝聲永相將過溪去溪水清鑑影太古雪  
尙留何嫌水光冷

牟珠洞

層山天半列作屏下有洞壑藏真經到門口缺若建瓴  
一徑斜入天光青飛空真人倚踈櫺法象奇古忘年齡  
千百萬態韜真形旋螺三折步不停石上戴石何瓏璽  
巖深無人杳冥冥石腹天矯參龍形中陷若穴堆蜻蛚  
凝脂點乳流素馨石嫩可搯膏猶零恍如鴻鐘撞寸莛  
絕巘往往揚空舩有聲無聲難可聆偉哉造物實至靈  
鑿出雷斧穿飛霆另闢一洞居明星小者如盎粗如瓶  
否亦或是仙人庭百丈高處懸飛鈴更有一曲雕雲聯  
馬前兩兩排仙伶馬旁力士疑五丁後來一人殊伶俜  
側首鬢影光熒熒回身匿避如丹邢千年老宦初削翎  
絕壁萬丈懸猱挺或如空原萃鵲鵲或如高枝綴蜻蛉

如人狝狝似豹飈回毛宜乘細角麝形奇態詭孰使令  
久視方得心神甯稍南一厓結作廳嫩綠錯雜同回汀  
碎影點出踈踈螢一門森森列萬釘五色變幻形鈴竈  
巨者恍若浮江萍山南如坎北若陘幸有巨石層層同  
萬古不入蛟龍腥靈風蕭蕭雨濛濛朔惜乏知時莫  
來遊如夢出若醒刻石欲作山前銘我留一言神倘聽  
巨斧徑欲鐫崕嵒一綫裂處開明廷從茲光怪不得肩  
正午赤日來亭亭時議欲用四川開鹽井法  
于巖頂鑿一穴以通日光

過新安塘未三里見絕頂一關高出鳥道卽隴首關也  
延回行半日始至

才過新安塘未抵隴首界嶺樹千重復萬重驚看白道

懸天外計程七里行半時我意尙覺來何遲回頭忽驚  
飛鳥墮隔却白雲穿不過

晚至龍里縣

清絕山城祇百家城門樓上晚吹笳猶餘濕翠收難盡  
商畧明朝作曉霞

早發龍里縣道中雜詩

濛濛四山雨中有一山晴漏得朝暾影林鳩復怪鳴  
絕巘疑無路雲穿一徑斜野花隨意放不復有人家  
山樵值山樵陡壁亦相揖濛濛雨不晴莓苔綴圓笠  
牛羊識分界不復過溪隈只有谿魚好斜穿石罅來  
全家三五輩種藥此山中開牖摘生果朝霞滿袖紅

誅茅構一亭遠近皆可徙因貪聽溪聲移入前林裏

觀音閣

溪聲流不盡三折到橋南初日紅猶斂殘冬綠尚酣乍  
疑僧入定真與佛同龕北閣休教掩衝寒性所耽

小除夕祭詩作

南行逾萬里小歲入三更爆竹驚心碎桃花照眼明

桃時

杏及海棠諸種並已盛開祭應遵舊例醉復盡餘觥笑向兒曹語今

年帙已盈

除夕寫歲寒圖貽徐太守日記

樂府新傳二十篇

太守近勸事定番蠻花犴鳥倍鮮妍

使君循蹟吾能識記得相逢又廿年

王辰年太守官使

者至六安  
得識面

風光知否入春無竹葉青  
葱柳眼蘇欲祝一番交誼永  
臨溪仍寫歲寒圖